

PRÆSIDE DIVINO NUMINE!
DISSERTATIONEM INAUGURALEM
De
LACTATIONE,

Auctoritate atq; Consensu
GRATIOSISSIMÆ FACULTATIS
MEDICÆ

in
Incluta NORICORVM VNIVERSITATE
ALTDORFFINA,

Pro

LICENTIA

Summos in MEDICINA Honores, Immuni-
tates, atq; Privilegia DOCTORALIA, more Majorum
legitimè capessendi,

Ad diem 27. Junii,

A. O. R. MDCLXXXV.

Pro virili defendet

CHRISTOPHORVS DANIEL MEZGER,
Posoniensis Hungarus.

ALTDORFFI,

Literis HENRICI MEYER,
Univerſit. Typographi.

VENERANDO PARENTI,
DOMINO
MARTINO CHRISTO
PHORO MEZGER,

Medicinæ Doctori, & Practico Ratis-
bonensi Seniori.

THESES HAS INAUGURALES,

pro tot Paternis beneficiis,

in gratæ mentis signum

sacras esse vult


Filius obsequentissimus

CHRISTOPHORUS DANIEL MEZGER,
Med. Ddus.

FELICITER!

PROOEMIUM.

PROVIDA rerum Parens natura , ut recens
natorum salutem consuleret, bina Lactis prom-
tuaria, non tam ornamenti , quàm necessi-
tatis gratiâ in medio Matrum pectore collo-
cavit, unde infantes, si gemelli etiam edan-
tur, proprio destituti auxilio, matrum ulnis
excepti, alimenti sui fontem haberent : Minimum enim
fuiſſet beneficium Patris Matrisq; concubitus, inquit
Seneca, nisi accessissent alia, quæ profecuta eſſent hoc
muneris initium, & aliis officiis ratum feciſſent. LA-
CTATIONEM ergo, ceu actionem, pro conſervandâ ho-
minum in dias has luminis auras editorum vitâ, ſummè uti-
lem & neceſſariam, in DISSERTATIONE hâc INAUGU-
RALI, ex GRATIOSISSIMÆ FACULTATIS
MEDICÆ ALTDORFINÆ indultu, proponere,
& præternaturales cauſas ipſam corrumpentes rimari, ſi-
mulq; curationem aliquatenus indicare placuit : Quod
quidem opus prolixiorẽ poſtulaſſet operam, ſed cum nec
temporis anguſtiſſimi ratio, nec aliæ conceſſerint cauſæ, ut
brevitatis limites excederem, Lector Benevolus æquam
gratiæ mihi largietur veniam, ſi rem omnem paucarum pa-
gellarum cancellis incluſam exhibuerim, plura alio daturus
tempore.



SECTIO I.

De Lactatione secundum naturam.

TH. I.

UT eò feliciter Lactationem, morbosq; lactantium foeminarum circa illam obvenientes declarare, & per causas suas examinare liceat, juvabit Lactis antea denominatam materiam, quam dico chylum admixto fero dilutum.

II. Scilicet is ipse sanguini commistus per arterias mammarias ab Aortæ ramo subclavio dimissas, ad mammarum orbes deferitur, ibidemq; à carne illarum glandulosâ, spongiosâ, συμφοδεσέρη & bibulâ (cui non alia est similis in corpore) secernitur, ac in peculiaribus tubulis Lacteis, ad necessariam usq; emissionem asservatur. Quin etiam, (si Philosophorum morem sequi licet, qui cum rem ipsam, uti se habeat, clarè percipere nequeunt, fingunt saltem modum ejus aliquem naturæ operibus consonum, & veritati proximum) Vascula Lactifera nonnulla ad foeminarum mammas nutriendi foetus gratiâ quoq; deferri, licet ὁψὲ καὶ ἔργω nondum sit sancitum, est tamen rationi admodum consentaneum, & argumentis à posteriori sive effectibus deductis, valde probabile, ceu eruditissimè demonstrat seculi hujus ornamentum *Gualterus Charleton Oecon. Animal. Exercit. III.* Nec dubitabit quispiam, fore, ut in tam clarâ Luce versantes Anatomicos dies propediem ad evidentem veritatem penitus deductura sit, sicq; tandem certis vestigiis semel demonstratis, latentem feram indagare liceat.

III. Interea massæ huic chylosæ aliquid de succoneuroso associari, non penitus negaverim.

IV. Nec etiam veritati repugnabit, si concesserim in glandulis dictis mammariis fermentum quoddam subacidiusculum, sed sale volatili valde temperatum inesse, pro facilitanda γαλακτοποίησις, quod haud adeò incongruè mammarum fermentum ideale, seu virtus earum digestiva vocari posset.

V. Por-

V. Porro Tubulos mammarum omnes sibi invicem inferi, & licet infinita sit furculorum propago, omnes tamen conspirare in papillarum extrema notandum est.

VI. Valvulas insuper circa papillarum cum mammis commissuram existere, & singulis ductibus Lactiferis per papillas pergentibus applicatas esse, ad exitum Lactis spontaneum & involuntarium impediendum, ipsa docet αὐτοψία, hæcquæ fluxus obstacula in Lactatione à fugentis Labiis linguâquæ pressione quâdam removen- tur, aut ita disponuntur, ut exitus Lacti tunc pateat, antea impeditus.

VII. Nunc ergo Lactationem describo, Lactis in mulierum mammis producti allectionem atque exceptionem ex papillarum tubulis, ab infante ope suctus & pressio- nis factam.

VIII. Et hæc quidem ut justè, & secundum Leges naturæ notas ac convenientes celebrata dici queat; requiritur I. debita ac æqua Lactis generatio. II. decens ejusdem motus & effluxus.

IX. Contra ubi alterutrum eorum vel utrumquæ vitiosè se habuerit, vel quocunquæ modo læsum fuerit, Lactatio pariter læsa fit, cui distinctè & specialiter explicandæ, ita jubente scopo proposito, jam propius accedendum erit. Sit ergo

SECTIO II.

De Lactis Generatione Læsâ.

TH. I.

Observatur nempe generatio Lactis quadruplici modo lædi:
I. Cum nulla fit. II. Cum nimis pauca. III. Cum nimia.
IV. Cum depravata quoad qualitates suas, videlicet consistentiam, colorem, odorem, saporem, crasin, puritatem.

II. Et I. quidem nulla fit Lactis generatio, nunc ipsarum glandularum, nunc fermenti Lactifici, nunc sanguinis culpâ. Nam peculiaria vasa Lactea ad mammas abeuntia, utpote demonstratione nondum manifesta, in curatione præteribo, ex iis tantum principiis, quæ pro certioribus hætenus habita fuerunt, ipsaquæ ocularis inspectio credere jubet, causas & methodum medendi deducturus.

III. Glandularum culpâ, quando vel naturâ deficiunt, vel etiam ab ortu solidiores nimium sunt, vel demùm aut ab internâ aut externâ quâdam causâ duriores aut scirrhosæ evadunt.

IV. Quando naturâ deficiunt, vitium incurabile est, nec minus quando ab ortu statim solidiores sunt, Lactis generationem etiam impediunt, notum quippe, glandulas, quæ nullum vel paucum admodum Lac producunt, solidiores durioresq; existere, nec mirum, quandoquidem hoc modo humorum in ipsis & per ipsas liberior motus (qui tamen organorum horum raritatem vel porositatem desiderat) intercipitur. Quod si ergo læsam talem conformationem sive structuram curare intendimus, mammas sæpius blandè fricare oportebit, & adhibere emollientia tam simplicia quàm composita, uti sunt, Herb. altheæ, lil. alb. malv. violar. fl. chamæm. lil. alb. malv. sambuc. sem. alth. fœnugr. lini, malvæ, tritici, cepæ coctæ, cortex sambuci, omnia gummata, medulla crurum vituli, pingued. anat. anseris, capon. humana, suilla, vitulina, vitellus ovorum, mucilagines variæ, ol. amygd. dulc. & amar. hyperic. irinum, lil. alb. lini, lumbric. terrestr. de vitell. ovar. violar. unguentum dialtheæ, martiatum, populeon, cataplasma ex micâ panis albi, cum vitell. ovar. & paxillo croci in Lacte coctum, Empl. diachylon. simpl. & comp. galbanetum, de meliloto, oxycroceum, ceratum de ammoniaco &c. Quibus salina alia volatilia item aromatica commodè admisceri poterunt, quò facilius ac felicius penetrent, & respectivè dissolvant & attenuent.

V. Quod si verò glandulæ prædictæ à causâ internâ duriores sint & evadant, erit hæc potissimùm humor acidus, austerrus, vitriolaceus, terrestris, vel in iis generatus, vel aliundè affluens, & à causis antecedentibus & procatarcticis subministratus, qualis cum difficulter moveatur, præmittenda erunt ipsum præparantia, in genere falsa & salina lixiviosa, in specie tartarus vitriolatus, arcanum tartari, seu terra foliata tartari, TRa tartari, arcanum tartari Noricum, tartarus tartarifatus, nitrum regeneratum, sal digestivum Sylvii, item crocus martis cum salibus, aperitivus &c. postea suggerantur evacuantia, vel emetica vel purgantia notissima; Studebit tamen prudens medicus,

dicus, ut materiam hanc vitiosam ducat, quò maximè vergere videbitur, per loca conferentia, juxtà monitum artis nostræ Principis, Divini *Hippocratis Sect. 1. aph. 21.* atque ultimò tandem subungere conveniet alterantia & corrigentia, quæ inter apprimè prodesse sale volatili abundantia & aromatica, spirituosâq; internè & externè in usum vocata, experientia docuit, & rectè, siquidem hæc ratione salis sui volatilis humorem acidum austerum, glandulosam substantiam incrassantem & constringentem corrigunt, ac paulatim volatilem magis, spirituosum ac dulcem efficiunt, sicq; fermentum Lacti suo generando iterum aptum reddunt.

VI. Inter interna verò remedia apprimè conducent aquæ spirituosæ ex aromaticis plantis & spiritu vini aut vino concinnatæ, simplices & compositæ, & quidem juxta placitum Sylvii destillatione potius quàm solâ infusione paratæ, hoc enim modo à crassioribus, quæ per infusionem simul remanent particulis depuratæ, gratiores, tum penetrantiores atq; efficaciores, fiunt. Præscribantur ergò aquæ cheiri, cinamomi, Lil. convall. meliss. lavend. veronic. zedoar. salv. quibus etiam aliæ aquæ itidem aromaticæ, non verò spirituosæ jungi poterunt, quales sunt aqua angelicæ, anisi, namp hæ, calam. aromat. carvi, caryophyllat. chærefol. chamæp. cheiri, cinam. commun. citri excortic. cochlear. coriandri, cumini, fœnic. lavend. lil. convall. majoranæ, meliss. menthæ crispæ, puleg. rorismar. rutæ, sambuci, flor. serpilli, zedoar. & similes, absq; vino confectæ, pro diluendis spirituosis, ut commodius assumi possint, additis præterea syrupis convenientibus, ut & salibus volatilibus, oleis aromaticis, & quandoq; ipso opio vel Laudano opiato, præsertim si vehemens humorum acrimonia urgeat, e. g. syrup. infus. flor. caryophyll. chamæpyt. de cinam. de cortic. citri, de hysopo, de menthâ, violarum, sal C. C. volatil. cranii humani volat. succini volat. urinæ volat. tartari volat. ol. macis, cinamom. anisi, fœnic. caryophyll. &c.

VII. Jam autem sicut internè prædictas aquas spirituosas & aromaticas commendavimus, ita externè quoque easdem laudamus cum sale volatili quovis nuptas, atq; linteo mundo, sæpius humectando, mammis applicatas: Nec spem curantis elu-

cludent unguenta & olea aromatica, præsertim si admixtis salibus volatilibus, aut sale armoniaco ad feliciorē penetrationem disposita fuerint; item gummata sub emplastri vel cerati, vel linimenti formâ imposita, talia sunt unguentum de Alabaistro, Mariatum, Aregon, Martiatum, Mastichinum, Nervinum, gummi elemi, aureum, basilicon majus & minus, ex bdellio, Apostolorum, ceratum de galbano, œsypatum, emplastrum de galbano, de crustâ panis &c. Nec in hoc casu rejicienda videntur balnea aquæ dulcis simplicia, vel cum convenientibus plantis decocta, ut & naturalia ex aquâ sulphurēâ calente constantia. Imò conducet etiam blandè fricari mammas, siquidem hâc ope vis medicamentosa aromatica, & salina volatilis tantò faciliorem ac liberiores per ipsarum cutem ad glandulas nanciscetur introitum; ab appposito vel appenso mammis Mercurio vivo Lactis proventum augeri, testantur Practici.

VIII. Indurantur porrò non rarò glandulæ ob sanguinem in ipsis subsistentem, & quandoq; extravasatum, unde tandem inflammatio mammarum, summos atq; atrocissimos dolores inferens oritur; cui occurrent post venam sectam superius memorata salina volatilia, & gummata resolventia, his verò refrigerantia, & si intensissimi dolores urserint opiata admisceri poterunt, eâ tamen observatâ cautelâ, ut refrigerantia modicè & prudenter adhibeantur, alias enim incongruè usurpata Lactis proventui omninò contrariabuntur; plura hûc transferri poterunt ex *Seç. II. Tb. XXII. § seqq.*

IX. Similiter glandulis externè nocua sunt acida, qualia foeminae nonnullæ pessimo more adhibent ad mammarum incrementum impediendum; sic aliæ incautæ alumen in usum vocare solent, ad impediendam, cohibendam, & sistendam Lactis generationem, utpote quod acido suo subacerbo, exsiccante, incrassante, adstringente, glandulas & fermentum ad producendum Lac inepta reddit, & in tali quidem casu præter laudatâ sæpius salina volatilia, & emollientia, Empl. de spermate Ceti, Empl. de cumino, Empl. diachyl. simpl. Empl. de galbano crocatum, itidem proficua fore credo. Nec minus debitam glandularum structuram lædunt foeminae, quando pectus nimis arctè, pro servandâ corporis gracilitate, constringunt.

X. Quo-

X. Quoad cæteras causas antecedentes & procatarcticas, malo huic (indurationi sc. glandularum,) fomitem suppeditantes, notum erit, Methodum Medendi contraria semper observanda suadere; ergò tantum monemus, si à frigore externo, vento nempe boreali & aspero, noxa inducta glandulis mammarum fuerit, sudorifera bono cum successu usurpari posse, e.g. Antimon. diaphoret. Bezoard. Martiale vel Minerale. C.C. absq; igne præp. ocul. canceri sal. card. bened. sal. volatil. C.C. eboris, & similia urinosa volatilia, ut eorum ope particulæ acidæ & rigidæ iterum è corpore eliminantur: Si ab ingestis acidis, austeris, glandulæ morbosum consimile seminium susceperint, post præmissa absorbentia & præparantia digestiva, primas vias evacuare conveniet, ope Enematum vel laxativorum medicamentorum; interdicto ejusmodi assumptorum ulteriori usu. Si verò à solo gravi animi affectu lactis in glandulis mammarum secretio turbata fuerit, ad humorum & spirituum inde diversimodè depravatum motum, crasinq; vitiatam, respiciendum, illucq; medicamenta dirigenda erunt indicata alterantia; & si e.g. animus vehementer agitato fuerit, mox sanguinem mittere conveniet, quod 1. plethora, 2. æstus ejus magnus, 3. motus cessans. 4. idem ad hanc vel illam partem nimium ruens, aut è vasis suis alicubi effluens, indicabunt. Et hæc de generatione Lactis læsâ culpâ glandularum.

XI. Jam verò Lactis generatio etiam II. læditur culpâ fermenti, (quod ad mentem & doctrinam Sylvii subacidiusculum, sed sale volatili valdè temperatum *Señ. præced. Th. 2.* pronuncia- vi,) quando istud vel in totum deficit, vel propter malam glandularum conformationem virtutem suam exserere nequit, vel ab humore maligno superveniente corruptum est: In primo casu tentetur fermenti restauratio per acida volatilia temperata; in secundo mala glandularum conformatio emendetur per blandum mammarum affricum, adhibita linimenta vel unguenta aromatica cum tantillo aceti vel oxymellis squillitici permixta; in tertio humor malignus, quem acidum viscosum ut plurimum esse credo, corrigatur per remedia in Thesi V. & seqq. laudata.

XII. Læditur tandem III. lactis generatio sanguinis culpâ, idq; contingit, vel quando subsistit, & subsequentem inflam-

mationem cum glandularum induratione inducit, vel quando acido atrabiliari humore, ipsum glandularum fermentum interdum destruente, interdum particulas pingues, oleosas, chylo-
 fas nimium coagulante, corrumpente, supprimente, inquinatus est, atq; ad medelam huc faciunt itidem antea jamdum proposita auxilia.

XIII. Et hæc de deficientis Lactis generationis causis & curatione dicta sunt, quæ causas & curationem Lactis parcius & minori copiâ producti (ut alendo infanti non sufficiat) facile monstrabunt, adesse nempe (ut paucis multa complectar) easdem causas, modo remissius agentes, quæ fuere generationis Lactis abolitæ, hincq; rationem & medendi methodum eadem Medicamenta in contrarium adhibenda docere, tantummodo remissius atque debilius operantia.

XIV. In specie tamen quædam adhuc circa hæc monenda occurrunt: videlicet glandulas mammarias interdum & nimis exiles, & producendo Lacti copioso minus aptas esse, quod ipsarum vitium omnino incurabile ferme habetur, nisi blandus mammarum affricus aliquid præstet, unâ cum linimentis & unguentis aromaticis, quale præprimis Martiatum; quandoq; fermentum nimis iners atq; debile, imò glutinosum existere, aromaticis ideoq; salinis volatilibus, & spirituosis acuendum & attenuandum; tandem etiam non raro sanguinem peccare, ut adeo ejus culpâ imminuatur aliquando Lactis generatio, idq; fieri 1. ob vasorum requisitorum aliquam absentiam, 2. quando sanguis chylosus parcus continetur in corpore. 3. quando parcus accedit ad mammas. 4. aliis in qualitatibus peccat. Sed de his plura.

XV. Quod itaq; attinet 1. vasorum requisitorum absentiam, quia ista arte restitui nequeunt, defectus lactationis hinc obortæ incurabilis relinquitur. Sanguis autem chylosus 2. parcus continetur in corpore, propter notabilem sui jacturam ex Lochiis mensibusve magnâ copiâ effusis, variis hæmorrhagiis, ipsis etiam vulneribus, præsertim ubi majora vasa sauciata sunt.

XVI. Quo in casu ita jubente Methodo Medendi 1. causæ effusionem sanguinis producentes removeantur. 2. Præsens san-

sanguinis effluxus cohibeatur, & novus impediatur. 3. sanguinis reparatio procuretur. In fluxu ergo Lochiorum nimio, propter violentam secundinarum detractionem, uteriq; lacerationem exorto, uterus excoriatus ocysissime consolidandus erit. Quod si eadem Lochia menstrua veniunt effluerint, aut etiam alia hæmorrhagia oriatur, propter sanguinem serosum, aut biliosum acrem, studendum, ut acrimonia illa concinnis medicamentis, alcalinis cum primis, terreis, cum aqueis diluentibus, itemq; emulsionibus amygdalatis, similibusq; blandis oleosis vel hordeaceis assumendis temperetur, & serum bilisve excedens minuatur, illud per diaphoretica, hoc per alvum subducendo, ope medicamentorum non nisi hospiti in materiâ medicâ ignotorum. Huc etiam quadrant incrassantia, siue sanguinem quodammodo inviscantia, uti lactuca, sempervivum, solanum, violaria, fl. papav. rhead. sem. 4. frig. maj. & min. lactucæ, malvæ, papav. & ex his paratæ emulsiones, lac chalybeatum &c. Si autem copiosus, aut alicubi congestus sanguis hæmorrhagiæ author fuerit, optimè conveniet venam secare; sic enim plethoræ indicanti per detractionem satisfit, & congestus sanguis ad pristinum motum invitatur. Si rarefactus sanguis effluxum nimium molitus fuerit, subaustera, incrassantia atq; refrigerantia conducent. Si flatus aut distensiones turbas sanguini intulerint, sudorifera commendamus. Si alia acrimonia rodens in vasis, aut extrâ ipsa subsistens animadvertatur, eadem per invertentia, & absorbentia contraria, cum opiatis prudenter mixta, corrigatur. Vulnera deniq; lege artis tractentur, primumq; omnium sanguinis profusio sistatur.

XVII. Imò cum res non naturales sæpè etiam causæ procatarticiæ hæmorrhagiæ qualiscunq; existant, ad ipsas etiam respiciendum erit; ita si ær æstuans tale quid excitaverit, idem fugiendus erit, temperandusve; si contrâ glacialis, fugiendus pariter, aut blandis aromaticis ejus aciditas ad acrimoniam vergens, corporiq; communicata, corrigenda, atq; cum sudoribus per emunctorium universale propellenda erit. Si nimis multa aromatica, & quidem acriora, cum alimentis ingesta fuerint, usurpanda sunt acrimoniam illam sensim mitigantia, tum aquea, tum subaustera, tum suboleosa, plantago, sempervivum, solanum,

num, lactuca &c. emulsiones variæ ex hordeo, amygd. dulc. sem. papav. albi & aliis appropriatis paratæ, quin & opium & opiata quævis blandiora, minimèq; acria, sed magis adstringentia, sæpius & quidem quantitate parvâ exhibita, uti sunt elect. diafcond. Fracast. Theriaca &c. Si effusio sanguinis à motu corporis vehementiori oborta fuerit, hoc quieti dandum, somnusq; conciliandus est emulsionibus blandis, non tamen narcoticis potentioribus; quod etiam de nimis vigiliis dicendum. Si ab alvo adstrictâ, ea enemate, teste Sylvio, remedio omnium blandissimo, tutissimo, præsentissimo, facillimo & aptissimo, laxanda est. Si ab irâ vehementiori, juverit rationibus solidis motos componere fluctus, emulsionibusq; laudatis blandum conciliare somnum.

XVIII. Quod ad secundam Indicationem spectat, ut ipse sanguinis effluxus cohibeatur, & novus impediatur, id præstabit Medicamenta, tum hiantia tum læsa vasa consolidantia, sub quâvis formâ, Decocti, Mixturæ, Conditi, Pulveris, Pillularumve exhibita, forinsecus etiam si licet, applicata; quorum pro lubitu ac necessitate seligendorum farraginem *Macasius in Prompt. Mat. Med. Sect. IX. cap. 21. p. m. 341.* recenset; inter præcipua tamen laudatur sanguis Draconis, cum quibusvis liquoribus facile jungatur, & quaquaversum transferatur: Inter eâ simul necesse est, ut ægra sibi caveat ab omnibus quæ humores in corpore exagitare, eorundemq; in ipso motum augere possunt, nec minùs evitet fugiatq; quantum licet omnes causas externas, adeoq; fortuitas, à quibus lædi, aperiri & vulnerari possunt vasa.

XIX. Sanguinis autem reparatio, (quam Tertia postulat indicatio) procurabitur per alimenta *εύχυμα & εύπεπτα*, qualia sunt juscula carniū animalium juniorum, caponum, emulsiones amygdalarum dulcium, pistaciorum, vitelli ovorum, & lac, talia namq; in assuetis præcipuè fœminis propter paucas recrementitias particulas haud difficulter in chylum abeunt, qui sanguini associatus, riteq; præparatus, in mammis lac constituit; ubi tamen notandum, summos Practicos semper ferè ea fœminis concedere, quibus delectantur maxime, quæ assumpta ferre possunt facillimè, & quibus nutriri solent copiosissimè.

Hoc-

Hocq; pacto occurritur etiam chylo ceu proximæ lactis materiæ, in sanguine deficiente, eundemq; minus chylosum & ad lactationem sustinendam insufficientem relinquenti.

XX. Cæterum imminuitur etiam Lactis generatio, quando sanguis chylosum parcius ad mammas accedit, quippe non juvat multum inesse corpori, nisi etiam in quantitate conveniente uberibus communicetur: Hoc autem evenit, quando arteriæ ipsum eò deducentes nimis exiles sunt, nec appropinquante partu, uti quidem decebat, ampliantur, sicuti alias plus sanguinis ad mammas deferendo earundem expansioni atque turgescentiæ ansam præbent; interdum etiam affectus aliquis in mammis, aut arteriarum canaliculis p. n. obortus, arterias quasdam aut consumit, aut notabiliter angustat, e. g. lateris combustio ab igne actuali, & aliquando forsitan à potentiali, quovis modo, prudenter vel imprudenter, circa arteriarum ductus applicato; Similiter præpostera pectoris angustatio ac vasorum compressio, aut eorum obstructio à pituitâ glutinosâ, lentâ atq; viscidâ, accusanda venit; Prius malum vix nisi lentè curari, aut ex parte saltem emendari poterit, & quidem blandâ ac frequenti frictione loci, per quem ad mammas tendunt vasa sanguifera; nam in partium, præsertim continentium emendatione ac mutatione à statu nativo, (cùm ea difficilius & segnius obtineatur,) non festinandum, sed lentè procedendum est; quapropter hic etiam monuisse juvabit, ne frictione vehementiore aut diuturniore quassentur, lædanturve mammarum glandulæ, sicq; inflammationi ansa detur; his autem frictionibus addi possunt unguenta & olea emollientia, qualia sunt ung. alth. popul. resumpt. mucag. nervinum &c. ol. lil. alb. amygd. dulc. chamæm. hyperic. irin. lini, lumbric. terrestr. populin. sapon. Venet. de vitell. ovar. pinguedo humana, & aliorum animalium, quorum omnium ope emolliri laxariq; possunt tunicæ arteriarum, sensimq; aptæ fieri, ut magis explicentur, sicq; ampliores redditæ plus sanguinis deferant ad mammas; hinc foeminas, quibus post primum partum paucum generabatur Lac, id magis copiosum & foetui Lactando sufficiens, sequentibus partibus fundere, observamus. Quod si tamen blandioribus frictionibus aut emollientibus extrinsecus admotis, arteriarum mamma-

riarum angustia corrigi nequeat, nec alia deficientis Lactis sub-
 fit causa, præstat ab ulterioribus moliminibus abstinere, quàm
 fortioribus graviora accersere mala. Interea cucurbitularum,
 præsertim non scarificatarum, dorso applicatarum usum, non-
 nulli Practicorum præcipiunt. Sicubi verò ab affectu quovis
 fortuito, aut alio, corrugatæ aut exsiccatae, consumptæve
 ex parte saltem fuerint arteriæ mammariæ, videndum, an re-
 mediis externis, præsertim oleis, linimentis, unguentis, em-
 plastris, cataplasmatibus, fotibus, balneis, & similibus emol-
 liri, sicq; ab adhærentibus viscosis & austeris humoribus sensim
 liberari, ac tandem iterum ampliari ac explicari possint: ubi
 ex paulò ante laudatis remediis quædam iterum modo dicto
 scopo apta erunt, item empl. diachylon simpl. & compos. de
 meliloto, ex gummatibus parata varia, tum cataplasmata ex
 rad. irid. nostr. lil. alb. liquirit. malvæ, alth. herb. alth. branc.
 ursin. verbasc. malv. melilot. mercurial. parietar. violar. fl. cha-
 mæm. croci, lil. alb. malv. melilot. sambuc. cum vitellis ovo-
 rum, Lacte, & similibus parata. Atq; his nihil efficientibus ac-
 quiescendum erit, & ferendum quod mutari nequit. Quòd si
 autem pituita viscida arterias mammarias obstruxerit, effe-
 ctum optatum dabunt sudorifera salina volatilia propinata, ho-
 rum namq; usu sanguis rarefiet, ejus motus excitabitur, clau-
 straq; obstructionis perrumpet; dum externè simul inungentur
 olea & unguenta aromatica salinis volatilibus permixta, item ta-
 lia emplastra atq; cataplasmata; Laudavimus suprâ instar omni-
 um unguentum Martiatum, quod & in hoc casu applicandum.

XXI. Jam verò si in aliis qualitatibus peccet sanguis, &
 viscosior atq; glutinosior existat, legnior hinc & parcior Lactis
 proventus sequetur, nam quatenus fermentum Lactificum est
 naturæ subacidæ ac temperatissimæ, facilè ejus operatio impe-
 ditur à sanguinis viscositate & glutinositate, quin & ipsum tan-
 dem tale evadit. Pro Curatione igitur sanguinis viscosioris
 glutinosiorisq; incisione ac correctione opus erit, quam inten-
 demus: (1) Medicamentis aromaticis & sale volatili abundan-
 tibus. (2) Medicamentis aciditate blandâ & volatili præditis.
 Aromatica regnum præcipuè suppeditabit Vegetabile, plus sa-
 tis nota, quàm ut prolixè recenseri debeant, uti potissimum

animale salia volatilia; at ex minerali acida petenda sunt, multo efficaciora illis vegetabilium acidis, hæc inter autem concreta salina inprimis obveniunt, ex quibus destillatione elici solent spiritus acres & acidi, additione spiritus volatilis & cohobatione frequenti blandiores & volatiles reddendi, ut sunt spiritus salis dulcis, spiritus nitri dulcis, elixir vitrioli Myns. &c. Quod si autem sanguis existat fervidus nimis, & ignis vitalis, voracissimus heluo, omne quod est pingue & oleosum chylosum, in Lac mutandum absumat, tunc sui attemperationem idem postulat per blanda acidiuscula præscripta, vel per aquea diluentia & refrigerantia, præsertim emulsiones ex talibus paratas. Fervori ejus ut plurimum conjuncta raritas est, similiter refrigerantibus & incrassantibus, admixto etiam opiatorum tantillo, & adhibito cætera legitimo sex rerum non naturalium usu, tollenda. Venæsectio etiam hic, si reliqua indicantia eam concesserint, non prætereunda. Quod si tandem sanguis terrestris nimium atq; vappescens peccet, salinis volatilibus, aromaticis, spirituosisq; excitandus atq; exaltandus erit, instituto insimul motu corporis, atq; vigiliis convenientibus, observatâ excernendorum ac retentorum lege, animoq; pathematibus hilarioribus recreato.

XXII. Et hæc de causis parciozem Lactis proventum inducentibus dicta sunt: nunc videbimus causas Lactis copiosioris, ob quod non tantum sæpè gravantur Lactantes, sed & non raro debilitantur: Nam quatenus ab ipso largius producto distenduntur mammæ, dolor excitatur gravativus & pondere suo angens, quatenus autem multum Lac vel sponte sua effluit, vel etiam Lactatione educitur, necessario sanguis nutritiâ, eâq; haud exigua sui parte, privatur, sicq; foeminæ debilitantur, quamvis notatum fuerit, has magis debilitari, quibus Lac sponte, quam illas, quibus suctione tantum elicitur.

XXIII. Quotiescunq; ergo tale quid contingit, causa ejus latebit vel in glandulis mammariis, vel in fermento, vel in sanguine, vel in posteriori utroq;

XXIV. Rarius multum Lac producitur, quando duræ sunt mammarum glandulæ, è contrario uberiozem ejus proventum hæ ipsæ molliores efficient; Videntur autem tales esse ob acidum

dum minus acre, acerbumq; in ipsis existens, quandoquidem acidum & acerbum quoquo modo usurpatum, eas indurare, experientiâ constat: Et hæc mollities, cum non adeò noxia & vitiosa sit, vix mutari debet, ne, dum aliquatenus glandulas condensare studemus mammarias, nimium quantum induremus, & rivulum evitaturi in amnem incidamus, majoremq; noxam accersamus.

XXV. Fermento Lactis ubertas debetur, quoties ipsum existit tum copiosum, tum potens & spirituosum. Erit tale vel naturâ, vel demum fiet inter alia propter aërem serenum, atq; ad frigus paululum vergentem, maximè verò propter alimenta acido volatili prædita, quæ simul ejus copiam & robur atq; efficaciam augebunt. Propterea si fermentum istiusmodi immutare animus est, abstinendum erit ab iis, quæ productioni illius occasionem quoquo modo suppeditant, contra talia in usum vocare decebit, quæ vim habent acidum tale in nobis obtundendi & infringendi, qualia sunt pingua & glutinosa, & acerba, & aquea, & acida fixa, & falsa lixiva fixa, e.g. varia extragacanthâ & mucilaginibus parata, succus acetosæ, acetosellæ, berberum, citri, granatorum, ribium, eorumq; syrupi & essentiæ, spiritus nitri, vitrioli, sulphuris & alii minerales, cremor & crysalli tartari, acidum tartari rubrum, crysalli acetosellæ, sal centaur. min. absynth. card. bened. & omnia ferè salia ex herbis per incinerationem parata; quin & conducet ad minuendam hujus fermenti energiam blandos quandoq; excitare sudores, propinatis etiam sudoriferis intentioni nostræ servientibus.

XXVI. Sanguini Lactis ubertas adscribenda venit, quando is non tantum laudabilis & optimus, sed & fluidus quoq; simul existit ac tenuis. Laudabilem verò optimumq; producunt temperamentum sanguineum, aër serenus ac temperatus, alimenta multi succi & facilis digestionis, corporis motus mediocris, somnus moderatus & placidus, excreta & retenta secundum naturam sese habentia, animus deniq; hilaris, ejusq; læta pathemata. Tenuem & fluidum (non intelligo hîc fluiditatem aqueam, sed spirituosam) efficiunt potissimum alimenta spirituosa & sale volatili abundantia, laudabili non tamen nimîâ copiâ ingesta.

XXVII. Unde, si non tantum multum, sed & nimium ideo producitur Lac, in id incumbendum, ut sanguinis chylosæ, nutritiæ, lactescentes portiones per enumeratorum contrarium usum aliquantulum detrahantur ac imminuantur; deinde etiam major ipsi viscositas ac glutinositas concilietur, quod fiet: (1) mutando aërem in aliquantò frigidiorē & asperiorē. (2) quoad alimenta, abstinendo à spirituosiss, maxime à salinis volatilibus, & in eorum vicem substituendo, quæ succo crasso ac glutinoso scatent, similemqu; producunt, qualia sunt vegetabilia valde succulenta, plantago, portulaca, fabæ, alchimilla, beccabunga, amygdalæ, sem. 4 frig. maj. & min. pyra, cydonia, mespila, cibi viscosiores, saliti, fumoqu; indurati, hic etiam proficui erunt; corpus (3.) minus movendo, sed quieti potius tradendo; somnoqu; (4) indulgendo; (5) partium subtiliorum blandam lenemqu; evacuationem procurando. (6) deniq; animum ad tristitiam mœstosqu; affectus componendo. Pluribus medicamentis, quæ urgente casu quodam, fons Pharmaceuticus supeditat, nunc recensendis supersedeo, sufficiat indicasse, hic etiam utilia esse salina fixa, item frigida, & re pective increassantia, qualia sæpius citatus *Macasius Prompt. Mat. Med. Sect. III. cap. 1, 2, 3, 4. § Sect. 8. cap. 9.* seligenda proponit; cum grano tamen salis applicanda.

XXIX. Restat inquirenda Lactis Generatio læsa, quoad qualitates ejus, scil. consistentiam, colorem, odorem, saporem, & puritatem. Laudatur Lac consistentiâ mediocri, culpatur crassum nimis; quod vitium & fermento acidiori, & sanguini crasso ac glutinoso adscribendum videtur: erit autem sanguis crassus vel propter acidum plus minus in ipso hærens, vel propter deficientes particulas spirituosas, abundantes contra terrestres fixas; vel propter particulas oleosas, pingues, chylosas in majori copiâ ipsi admixtas, vel propter absentiam seri sufficienter eundem diluentis. Jam verò quomodo fermento acidiori, acidoqu; in malsâ sanguineâ abundanti, deficientibusqu; spirituosiss portionibus subveniendum sit, ex antecedentibus, quæ huc quoq; referri debent, peti poterit. De chylosis exsuperantibus particulis monendum, eas potissimum per sex res non naturales minui, aërem nempe calidiorem, cibum non multi succi, sed

C

parti-

particulis salinis volatilibus, aromaticis scatentem, potum minus generosum, sed aqueum diluentem; motum, vigiliasq; excessivè admissas, & alia; Medicamenta si quæ assumere placet, ea vel salina volatilia, aromatica, sint, vel aquea: Absentia serivèrò recuperatur per aërem frigidiorè & humidiorè, cibum humidiorè, potumq; largiorè, somnum & quietem frequentiorè; medicamentis verò hîc multis non opus esse videtur, quum Diæta plurimum in tali casu præstet. Nec minùs interdum lac generatur tenue nimis, propter fermentum aquosum, debile, vel plus justo salinum volatile, sanguinem pariter tenuiorè & fervidiorè, majoriq; seri copiâ imprægnatum; intereâ quomodo in specie fermentum aquosum & debile resuscitandum sit, aut nimis volatile figendum, jam satis docuimus; pari quoq; ratione sanguinis tenuitas atq; fluiditas coercèbitur; imprimis autem Lac tenuius incrassabitur paululùm, prudenti ac diutino usu austeriorum blandiorum remediorum alimentis junctorum.

X XIX. Color Lactis bonus est ex cœruleo albicans, malus judicatur flavescentis aut impensè albens; impensè albicans Lac ferè semper simul existit crassius, propter pituitam plus minus in sanguine abundantem, educatione ac correctione curandam; eliminabunt illam vulgò sic dicta phlegmagoga, sed per epicrasin & parvâ dosi exhibita, cum suis stimulantibus & corrigentibus aromaticis, ex quibus pro lubitu variæ concinnari poterunt pulverum, bolorum, pilularum, emulsionum, haustum, & electuorum formulæ; corrigent autem felicissimè aromatica, salina volatilia, notissima. Flavedinem autem lactis quod cernit, hæc oriri videtur à bilis Tincturâ, in sanguine exsuperante, atq; Lacti communicatâ, ubi pro evacuationis scopo communissima commendamus cholagoga, hæc q; per intervalla exhibita, additis itidem stimulantibus & carminativis; Post hæc proficua erunt bilem excedentè præcipitantia & corrigentia, ea q; acidiuscula, uti sunt spiritus salis, sulphuris, nitri & vitrioli, simplices, vel quandoq; dulcificati, Mixt. simpl. Clyss. mineral. syrup. acetos. acetosellæ, acetosus simpl. & compos. acetos. citri, berberum, ribium, cerasor. acid. essent. acetos. acetosell. citri, Træ bellid. rosar. violar. papar. rhead. cum phlegmate

mate vitrioli præparatæ, crem. & cryſtall. tartari, cryſtall. acetofell. & ſimilia. tùm etiam alcalina terrea abſorbentia vulgatiſſima. Sylviuſ præ omnibus laudat vitriolum ſuum depuratum, & imprimis ex ferro paratum, quod ſi ulterius præparetur, plus præſtare ait, ac præſertim ejus ſulphur anodynum. Ceterùm lac odorem diverſum ſpargit pro ratione variorum odoratorum aſſumtorum, vel aliorum etiam, ſanguini communicatorum, qui tamen ſubtractis iis facilè iterùm evaneſcet.

X X X. Sapor lactis naturalis aliàs dulcis eſt: Interdum tamen amaricat, idq; propter bilem ſanguini ejusq; ſero permixtam, non raro etiam ipſi fermento Lactifero communicatam, tametſi enim nonnulli negent, ſerum unquam amarum reperitum fuiſſe, id tamen contra viſus atq; guſtus ſenſum loquuntur, quippe ſerum ſanguinis per V. S. emiſſi, sæpè sæpius & colorem inſpicientibus flavum, & ſaporem guſtantibus amaricantem, certiffimo commiſtæ bilis indicio, obtuliſſe, præter aliorum etiam celeberrimorum Practicorum teſtimonia, me pariter docuit fideliffima Informatio ex ipſâ autopſiâ deducta, *Nobiliffimi, Excellentiffimi, & Experientiffimi Viri DN. JOHANNIS MAURITII HOFFMANNI, Philoſoph. & Medicinæ Doctõris meritiffimi, Chemiæ atq; Anatomie Profeſſoris Publ. celeberrimi, Facultatis Medicæ p. t. Decani ſpectatiſſimi, S. R. I. Naturæ Curioſorum Collegæ digniffimi, Dn. Promotoris ac Præceptoris ad aras colendi*; corrigendus itaq; erit ſapor hic nauleabundus diminutione bilis univerſali, per blanda cholagoga ex antecedentium ſerie eligenda; non neglectis congruis pro exceſſivæ bilis eliminatione diaphoreticis, itidemq; abſorbentibus, pro corrigendi atq; imbibendi fine. Prætereâ quandoq; Lac ſubſallum generatur, à ſero ſanguinis ſalſo muriatico arctius ipſi juncto, quod optimo cum ſucceſſu per Hydragoga sæpius & minori quantitate exhibita, corrigitur; Sudorifera & Diuretica commodo hîc etiam ſuo non carebunt uſu; & inter Sudorifera quidem laudem merentur, cortex ſambuci, C. C. bolus armena, ebur foſſile, terra ſigillata, terra ſileſiaca, ſtrigenſis, Decoct. & eſſent. Lignorum, aqu. card. bened. ſambuci, ſcabioſæ, decoct. C. C. ſpiritus C. C. guajaci, ſaſſafras, fuliginis, bacc. ſambuci, ſcordii, ſalis armoniaci, Liquor C. C. ſuccinatus, miſtura ſimpl. ſeu Diaphoret.

Andernac. TRa Bezoartica, ex sambuco, Rob Juniperi, Sambuci, Veronicæ, Antimonium diaphoret. cerussa [antimonialis diaphoret. magist. C. C. Inter Diuretica verò huic fini inserviunt varia ex *Macas. Prompt. Mat. Med. Sect. 9. cap. 7.* pro usu petenda, quorum præcipua ferme sunt, sal volatile tartari, Tra tartari, oleu æthereum Terebinth. baccar. Junip. extract. heder. terrestr. succus expressus raphani orbicularis, nasturtii & cochleariæ, aqua sambuci ter destillata, fragorum simpl. & cum spiritu vini, raphani rusticani, ceparum, petroselini, nephritico-Diuretica *Clariss. Wepfferi*, & salia lixiva quævis ex vegetabilibus arte parata, maximè verò è fabarum stipitibus, urticâ, genistâ & ab-synthio &c. Quisquis autem formulas ex pluribus vegetabilibus usu approbatis legere desideraverit, evolvat Felicis Plateri *Praxin Medicam in Curat. ascitis Hydropis. p. m. 254.* Balnea in-super aquæ dulcis tepida salia hæc sylvestria muriatica multum diluent, atq; per poros corporis educunt.

XXXI. Purum dicitur Lac, quando nullis heterogeneis particulis permixtum est, sed ex suis oleosis, chylosis, pingui-bus, sero dilutis, constat; Varia tamen heterogenea quandoq; corpora ipsi permiscentur: Hic sibi locum vindicat observatio *Aristotelis* adducta *VII. de hist. animal. cap. 11.* Si lactans pilum cum cibo aut potu ingerat, ad mammas pervenit, & in earum papillis consistens, morbum inducit, qui *τετχίασις* nominatur: Sic etiam inflammationem mammillarum ex pilo hausto memo-rat *Zacutus de P. P. M. Lib. II. Hist. 30. f. 234.* Nec silentio præ-tereunda est à *Prospero Martiano Comment. in Hippocr. de Nat. pueri* allata observatio, de Matronâ quâdam Romanâ, cujus è papillâ Chirurgi manu extractus fuit Cichorei furculus, quem hesternâ coenâ comederat: & alia de puero quodam, qui fufu-res cum fæcibus deposuerat, cum panem furfuraceum come-disset nutrix. De Lapidibus in mammis visis, testatur *Severi-nus*, atq; de diuturno puris fluxu è mamillis. Sanguis extrava-satus ac grumofus, sæpius cum Lacte excernitur. Aphorismum tamen *Hippocratis 40. Sect. 5.* ex iis esse quæ raro eveniunt, do-cet Commentator ejus *Galenus*. Assuguntur adhæc cum La-cte mores & morbi ipsi nutricis, uti toto die patet, vel tussien-tem matrem seu nutricem infallibiliter quasi conciliare tussim infanti,

infanti, Scorbuticas, Lue venereâ laborantes, inficere infantes pueros. In orphanotrophæo Patavino, La casa di Dio dicto, infantes qui ibi educantur projectitii, ac unum ferme omnes morbo Gallico inquinati sunt, propter Lac nutricum eâdem spurcitie infectum, quod sugunt. Quid? quod ipsa doceat quotidiana rerum Magistra, pueros tenellos purgari per pharmacum nutricibus propinatum, ac deinde mediante Lactatione ipsis communicatum, sicuti jam olim novisse Divum senem ex verbis ipsius clarum est, quando *Lib. VI. Epidem. Sect. 5. t. 33.* inquit: *Mulier autem & Capra, elaterium aut cucumerem Sylvestrem comedentes, pueris purgatio.* Quapropter in lacte, impuro culpâ matris reddito, emendando, Medicus causarum procatarepticarum, tum antecedentium rationem habebit, easq; partim tollet, partim interdicit, partim corrigit. Et hæc quidem de Generatione Lactis læsâ dicta sunt!

SECTIO III.

De Lactis Motu & Effluxu læso.

TH. I.

UT Lac in foeminarum uberibus ritè paratum, metam, cui destinatum est, (nempe utilitatem & nutritionem foetus) attingat, ad ipsorum papillas, quin etiam per has moveri debet, quem in finem ductus & canales, sive tubuli Lactiferi formati sunt, à glandulis mammarum ad papillas & per papillas exportecti; ne verò involuntario atq; nocivo Lactis effluxu sexus hic sequior tentaretur, prudentissima natura singulis ductibus membranulas sive valvulas, exitum Lactis spontaneum impediennes, applicavit; quotiescunq; ergo suavissimo suo, & vel ipso nectare atq; Deorum ambrosiâ sibi gratiori obsonio pasci gestit tenellus, ut fluxus impedimenta removeantur, labiorum compressione, & huic conjuncto succtu exitum Lacti parare debet, accedente etiam applicatâq; circa papillam linguâ, quæ etiam salivam papillis applicando, & poros leniendo, procul dubio ad Lactis quoq; educationem aliquid confert, unde forsan multæ foeminæ, antequam mammis foetum admoveant, pro-

priam papillam madefacere, sicque Lactationem facilitare solent.

II. Et ita ferè fieri credo atq; absolvi Lactis motum & effluxum è mammis per papillas naturalem, qui septemplici potissimum modo præter naturam vitatur: Et (1) quidem, quando nullum. (2) quando parcius quàm decet, Lac in mammis jam præsens per papillas effluit. (3) quando difficulter ac cum dolore. (4) quando facilius ac spontè, sive sine suctu. (5) quando per vias inconuenientes, non item per tubulos papillarum. (6) quando cum Lactantis debilitate. (7) quando ejus loco sanguis, pus, sanies, aliusve humor diversus egreditur.

III. Nullum autem Lac effluit, quando in mammis stagnat, nec per papillas exit, idq; vel ipsius Lactis, vel viarum angustatarum aut compressarum, vel deficientium papillarum vitio.

IV. Lactis quidem culpâ tale contingit, quando istud in vasis, atq; in ipsis adeò mammis coagulatur & grumescit; quam coagulationem potissimum derivo ab acido, sive istud undecunq; in corpore productum, auctum, & ad mammas delatum sit, sive forinsecus imprudenter mammis applicetur; tum ab aëre frigido & acri ad mammas, & imprimis sudantes admissio, item ab aquâ frigidâ, & similibus &c.

V. In corpore producit acidum maximè ab alimentis, condimentis, medicamentis acribus, acidis, assumtis vel copiosius, vel diutius; augetur verò & intenditur ejus vis à cæteris rebus nonnaturalibus, præcipuè ab animi mœrore aut dolore gravi, Lactantes fœminas corripiente.

VI. Forinsecus autem ab imperitis quibusdam, imprudenter satis, Lactantium mammis acidum fortius applicatur, v.g. acetum, alumen, si erysipelate aut inflammatione quâdam aliâ externâ correptæ sunt; nam tametsi talia his affectibus curandis aliàs idonea esse possint; in ejusmodi tamen circumstantiis, ubi eodem tempore Lac in mammis gignitur, rejicenda sunt.

VII. Præterea sæpius & incautè, & incastè admodum, aëri externo frigido & acri Lactantes quædam sua exponunt ubera, hoc enim modo, (præcipuè si sudore madent) per patentem ipsarum poros aëri acri, acido, copiosior ac nocivus patet ingressus. Ita quoq; valdè noxium est, easdem mammas calentes ac sudantes,

tes, aquâ frigidâ madefacere; aut pluvix nudatas tradere; quandoquidem hâc ratione pori aperti repentè implentur, constri-
guntur, & propter horrorem Lac in viis suis facilè stagnat & co-
agulatur; Taceo aquas quasdam, præsertim pluviales, nonni-
hil mineralium, acidarum, metallicarum particularum in gre-
mio fovere, unde coagulationis manifesta sese offert causa.

VIII. Recensitis in calibus, Indicatio curatoria tria
hæc requirit. (1) ut removeantur causæ externæ omnes ne am-
plius noceant & curam impediunt. (2) ut corrigantur & emen-
dentur causæ internæ. (3) ut Lac coagulatum resolvatur, & mo-
tus amissus ipsi restituatur.

IX. Dixi extrâ applicatum acidum fortius, aut aërem acrem
acidum, aut frigidum mammis admissum, Lac in ipsis coagula-
re; ubi ergo ex inconsiderato dictorum usu & occurfu, error
commisus fuerit, præstantissimum omnium erit, (ut primæ sa-
tis fiat Indicationi) removeere nocentia, & imponere ea, quæ
acidum coagulativum corrigere, noxamq; tollere possunt.
Talia verò sunt aromatica quævis, quovis modo præparata, &
vel sub fosis, vel cataplasmatibus, vel unguenti, vel linimenti,
vel emplastri, vel aliâ formâ imposita. Ita namq; Plantæ aro-
maticæ, mentha, majorana, ruta hortensis, absinthium &c.
poterunt decoqui in vino generoso, addendo subinde sub finem
(ut efficacius reddatur decoctum) ipsum spiritum vini, hocq; fo-
mentum calens applicare mammis licebit cum pannis lineis, la-
neisve, atq; toties iterum renovare, quoties aut exficari aut re-
frigerari incipit. Ex iisdem plantis cum vino Decoctis & contu-
sis, parabimus quoq; cataplasmata mammis imponenda. Si pa-
tientes pingua perferre possunt, non disuademus inunctionem
mammarum cum oleis, unguentis, & emplastris aromaticis.
Imprimis autem aër frigidus & acer, cane pejus fugiatur & an-
gue, mammæq; contra ipsius injurias omni curâ muniantur, si-
quidem quodvis frigus externum hîc maximè noxium est, quod
etiam de aquâ quavis frigidâ & pluviali monendum.

X. Secundam Indicationem quod concernit; abstinendum
ab omni abusu, vel si possibile fuerit, usu alimentorum, condi-
mentorum, & Medicamentorum acidorum, aut ea ulurpentur
ad minimum in exiguâ quantitate, ita namq; acidi peccantis ex-
cessus

cessus corrigetur , & ad mediocritatem redigetur : Somno & quieti plus omnino dare licebit : Excernenda omni studio promoveantur : Animi verò mœror atq; terror præcaveantur , vel si præcavere impossibile fuerit, affectus isti minuantur , animum in adversis firmando , contraq; audentius eundo. Propinanda insuper erunt acidum tale in corpore infringentia , eaq; quovis tempore ac modo grato & convenienti , quò pertinent potissimum toties jam laudata salina volatilia & aromatica , quæ cum absorbentibus alterna amabunt.

XI. Interdum etiam febrile frigus molestum, Lac grumescere facit, forsan propter succi nutritii, in materiam nitrosam & acrem degeneris, fluorem (ceu phœnomenon hoc explicat *Willisus Tract. de Febris cap. 3. p. m. 82.*) ut ergò causæ huic coagulanti præveniatur, eademq; minuatur, suademus medicamenta, non tantum sale volatili abundantia , sed imprimis aromatica tum spirituosâ , tum oleosâ , qualia sunt rad. contrayervæ, Imperat. cortex chinæ chinæ Indorum, fol. absynth. card. bened. ruta, serpillum, nux moschata , cariophylli , piper, aqu. vitæ Matthioli , Theriacalis simplex, sal volatile succini, C. C. armoniaci, salia volatilia oleosâ , aliaq; infinita ex aromaticis plantis & spiritu vini parata : Sylvius nullum præstantius remedium ad frigoris febrilis molestias moderandas superandasq; , se reperisse, expertus confirmat, quam oleum cariophyllorum : & talia tum ante paroxysmum febrilem, tum ipsius frigore durante, parvâ quantitate subinde exhibere conducet : Sed pluribus febrilis affectus curationem nunc proponere, mei non est instituti, quæ exigente casu & necessitate ex Practicorum Libris commodius peti poterit.

XII. Frigida porro vel alimentosa, vel medicamentosa, vel ex utroq; mixta, nimium usurpata, consimilem edere possunt effectum, quia humores increassant, poros occludunt, adeoq; sanguinem & Lac subsistere, subsistentia tandem coagulare faciunt. Id circò sanitati vix melius consuli poterit, quam à talium immoderato usu abstinendo, & horum loco salina volatilia, aromatica, spirituosâ , assumendo, & extus etiam applicando.

XIII. Quodsi tamen in quibusdam hætenus memoratorum error ex incuriâ commissus fuerit , atq; nocivus eventus
(Lactis

(Lactis nempe coagulatio) subsecutus fuerit, in id incumbere oportet, juxta indicationem tertiam, ut idem iterum dissolvatur, & fluxile factum viâ ordinariâ per papillas iterum effluat. Cum igitur aromatica & spirituosâ ad Lactis coagulati dissolutionem plurimum faciant, eadem quæ præced. Thesisibus commendavimus, hic etiam in usum vocare licebit, videlicet quæ coagulationi Lactis præcavendæ, eidem etiam coagulato iterum resolvendo & restituendo conveniunt; si tamen insuper sal volatile quodvis, & in specie armoniaci, cum spiritu vini & aquâ aliquâ aromaticâ misceatur, vixq; tepens mamina imponatur, aliquoties renovandum, plurimum certè promovebitur Lactis coagulati dissolutio; nec gummata, utpote alias potenter resolventia, hic omittenda sunt, bdellium puto, benzoinum, galbanum, gummi ammoniacum, animæ, arabicum, ladanum, mastichen, myrrham, olibanum, opopanax, sagapenum, sandaracham, sanguinem draconis, sarcocollam, styracem calamitam & liquidam, tacamahacam, thus &c. quæ in emplastra redigi poterunt cum cerâ, spermate ceti admixto, quale etiam jam notum est emplastrum de spermate ceti dictum; nec alia emplastra resolventia hic suo carebunt effectu, uti diachylon simpl. & cum gummis, emplastrum Malacticum Excellentiss. DN. D. HOFFMANNI Junioris, de meliloto &c.

XIV. Haud rarò tamen contingit, ut vel per incuriam ab ipsis ægris, vel per imperitiam potius à curantibus, Lactis coagulati dissolutio negligatur, sicq; Lac coagulatum amplius corrumpatur, tandemq; factâ inflammatione pergat ad suppurationem, quippe omnis ferè inflammatio ad suppurationem tendit, nî præveniatur.

XV. Antequam ergò ad hujus curationem accedam, præsuppono (1) Lac coagulatum quidem restitui posse in integrum, non item corruptum, & in pus mutatum. (2) Lac non universum semper simul in pus corrumpi, sed paulatim ac per partes, cumq; licet non universa ejus suppuratio, aliqua tamen ejus pars impediri nequeat, sollicitum etiam tunc esse continuò de antevertendâ Lactis suppuratione, debere medicum, ubi nullum amplius dubium est de inchoatâ ejus suppuratione.

XVI. Propterea quodcumq; Lac in foeminarum mammis subsistens, ipsas distendendo ac dolores pariendo, inflammatio-

nem minatur, hinc & subsecuturam suppurationem, optimè hæcce nuper laudatis tum aromaticis, tum spirituosiss, tum sale volatili abundantibus mox præcavebitur, quæ tamen inter potissimum sibi meritò locum tribuunt cepæ, sub cineribus assatæ, quò acrimonia earum excellens mitigetur; eandem indurationem mammarum ex Lactis copiâ subsistente, unius diei spatio curari asserit Barbette in Anat. Practicâ, unguento althææ composito, modò suctione mulieris alicuius aut catelli materia aquea sæpius educatur.

XVII. At cum jam inchoata est suppuratio, quod cognoscimus ex dolore pungente, ac cum calore in mammis perseverante, jungenda prioribus erunt emollientia, sic dicta pus generantia, (non quod reverà pus producant, sed quod ipsum blandius producant, atq; partes ita disponant, ut à pure minus malè afficiantur,) quæ in cataplasmatibus formam redacta, dolentibus atq; induratis mammis applicari poterunt, quandoquidem his ipsis, & Lactis coagulati solutio citius procurabitur, & nondum corrupti suppuratio impediatur, aut jam corrupti suppuratio & maturatio promovebitur. Erunt autem inter emollientia lil. albor. bulbi, rad. althææ, malvæ, violariæ, brançæ ursinæ, mercurialis, ut & earum folia, farina fabar. alth. orobi, lini, hordei, fœnugr. ol. lil. alb. amygd. dulc. rosar. violar. malvæ, chamæm. mucilag. sem. psillii, lini, fœnugr. cum aqu. rosar. extract. fl. chamæm. rosar. sambuc. axungia suilla, pinguedo humana, anseris, gallinarum, vituli, butyrum, caricæ pingues, unguent. althææ simpl. & compos. empl. de mucilag. & similia in vulgus nota, & apud chirurgiæ scriptores passim commendata. Convenient præterea Venæsectiones, purgationes, & sudoris provocationes, sicq; quicquid Lactis coagulati restitui potest, restituetur, quod verò restitutionem negat, citius atq; facilius ad suppurationem perducetur, omnia symptomata remittent, dolor, tumor, & ardor brevi minuetur, ipsa suppuratio citius absolvetur, post factam spontè vel arte apertionem minus puris prodibit, ipsumq; ulcus, si rectè tractetur, citius atq; certius mundabitur & consolidabitur. Frigida autem quæ nonnulli Practici applicare jubent, propter fidem suspectam omninò ipsis relinquo, rationes & experientiam propter quæ Sylvius in
hoc

hoc casu repellentia in totum damnat, consideratione dignas esse persuasus.

XVIII. Nunc autem, quamprimum Lac in pus mutatum fuerit, quod arguet doloris, duritiei, & ardoris imminutio, apostema spontè & per se rumpetur & aperietur, quod nisi fiat, lanceolâ mox idem aperiendum. Barbette quidem in Anat. Pract. corrosivo potius quàm phlebotomo omnem suppurati tumoris apertionem suadet, sed nescio quàm ob causam, cum nostra via & brevior sit & tutior: In eo quidem cum ipso sentimus, quando in loco profundiore abditum est pus, nec penetratio cutis à pure satis citò expectari potest, ad cauterium potentiale confugiendum esse, ne longiori morâ partes vicinæ à pure magis magisq; corrumpantur.

XIX. Quandoquidem autem delicatiores mulierculæ, apertionem per ferrum instituendam, perferre nolunt, vel non audent, cutis rarefactio & penetratio valdè emollientibus promovenda erit, quem in finem apprimè conducet unguentum basilicon, populeon, resumptivum, anodynum, ol. amygd. dulc. chamæm. irinum, lil. alb. lini, de vitell. ovor. de croco; inter evporista loco omnium meritò laudatur ficus assa, tumori imposita, quæ eum insigniter maturat & aperit.

XX. Aperturæ quovis modo factæ (quam puris effluxus indicabit) turundam intrudere oportet, & hujus ope ad curationis usq; finem indere Balsamum sulphuris vulgarem, terebinthinatum, anisatum, succinatum, aliumve; super turundam autem imponi poterit empl. diapalma, diasulphuris Rulandi, diachalcitheos, Noribergense, vulnerarium Zwölfferi, vel aliud conveniens, & quamdiu durities molesta in mammis permanferit, eas fovere decet cataplasmate conveniente, discutiente ac resolvente, qualia egregia satis descripsit Barbette in *Chirurg. Pract lib. 3. cap. 1. p. m. 124. § seq.* & talis cataplasmatibus usus tamdiu continuandus est, donec durities ista remiserit, quâ tandem sublatâ, ab hujus etiam cataplasmatibus usu desistere licebit, sufficietq; solus balsamus sulphuris cum emplastro quodam ex recensitis, aut alio conveniente, quale est empl. gryseum, delap. calamin. diapompholyg. album coctum.

XXI. Sed memorem ordo mihi vellicat non quidem au-

rem verum mentem, ut circumspiciam, quomodo Lactis motus & effluxus impediatur, ratione viarum, per quas solet fluere? Accusandæ verò hîc sînt papillæ, & tubuli lactei lac continentes, quod ex ipsis exsugî, expelli & emulgeri solet; de papillis inferius dabitur loquendi occasio, sed tubulorum vitio tale malum gignitur, quando vel statim in suo exortu, vel demum in progressu angustati sînt, & sæpius quidem per compressionem, rarius per obstructionem, quippe vix ac ne vix quidem continget, ut omnes tubuli simul obstruantur; quod si tamen tale quid fiat, erit à Lacte in ipsis coagulato, potissimum per frigus mammas graviter afficiente, atque ipsorum calens Lac coagulante, quod vitium fomenta aromatica, & salia volatilia ipsis juncta, frigidus etiam aër vel correctus vel evitatus, cæterarum deniq; causarum externarum intermissa occasio feliciter tollent. Sed comprimuntur præter alias causas externas ut plurimum à tumore, vel papillas vel ipsas mammas in locis vicinis occupante, & præcipue ab inflammatione. Hæc inflammatio cum à sanguine extra sua vasa effuso, adeoq; stagnante, ad corruptionem appropinquante, & partes circumjacentes angente atque angustante oriatur, quæ paulò ante in Lactis coagulatione ac subsequente inflammatione laudavimus Medicamenta, etiam hîc, præsertim sub cataplasmatibus, quantum licet, formâ adhibita, locum habebunt; præ cæteris autem utile est emollientibus adhibendis salia volatilia jungere, quæ virtute suâ penetrante coagulatum sanguinem ita discutient, ut sæpius suppuratio præcaveatur; si tamen nihilominus successerit, eadem simili modo, quem in eodem tradidimus casu, ruptumq; apostema balsamo sulphuris anisato curabitur.

XXII. Læditur secundò motus & effluxus Lactis, quando Lac, utut præsens, justo tamen paucius è mammis effluit. Idq; iterum vel ob sui, vel ob viarum, vitium. Ob sui vitium minus rectè effluit, cum præter naturam crassius & glutinosum magis est, cujus causæ & curatio ex antecedentibus hîc transferenda erunt. Nempe (quod hîc notandum) usurpanda statim veniunt, & quidem in tempore aromatica, salina volatilia, & internè & externè, ne ex neglectu hujus morbi malum adaugeatur, & Lactis effluxus in totum impediatur, sicq; inflammationi & suppu-

suppurationi ansa detur. Cæterum non videtur necessarium prolixius huic affectui inhærere, nam quæ nuper de motu & effluxu Lactis abolito memoravimus, prudens Medicus eidem imminuto applicare sciet.

XXIII. Accedo igitur ad Illam læsi lactis effluxus speciem, quando idem elicitur & effluit, sed difficulter, cum molestiâ & dolore; nempe difficulter, quando angustæ sunt ejus viæ, quod naturale vitium vix, aut per emollientia ægrè curabitur: cum molestiâ autem & dolore elicitur (1) quando papillæ vel mammæ inflammatae sunt. (2) quando eadem papillæ excoriatae sunt & exulceratae, idq; vel ob infantum sugentium os, h. e. labia, gingivas, palatum & linguam, ardore, pustulis, aphthis, aliisq; malè affecta, vel ob erysipelatis quandam speciem ipsas corripientem, vel deniq; ob ipsum lac spontè ac continuo effluens, & postquam illud acrimoniam adeptum est, papillas & mammas excorians. (3) quando fissæ sunt, vel aliter malè affectæ & dolentes.

XXIV. Quibus ex causis papillæ inflammentur, & quomodo iis medela adferri queat, nuper abundè (utî credimus) demonstratum. Quando verò papillæ excoriantur & exulcerantur ab ore infantum malè affecto, ad duplicem scopum cura dirigî debet: (1) ut affectus infantem urgens tollatur. (2) ut papillæ excoriatae & exulceratae pristino statui restituantur; de priori pluribus differendi ratio nunc non fert, cum de Lactatione læsâ respectu foeminarum & matrum hîc mihi tantum sermo sit, poterunt tamen de his Practicorum Libri passim consuli. At tamen sedulo notandum, si papillis læsis succurrere animus est, affectum prius, os ac salivam infantis corrumpentem, curandum esse, cum alias lateres aut Æthiopem lavaremus: Posthæc demum excoriatas aut exulceratas papillas aggredi licebit, cumq; excoriatio papillarum earum etiam æstum ut plurimum mali complicem habeat, eundem temperantia, cum blandis exsiccantibus, apprimè convenient, idque præstabunt herba endiviæ, lactucæ, nymphae, plantag. tarax. fl. fabar. malv. violar. rosar. endiv. nymph. papav. rhead. sem. 4. frig. maj. & min. hyoleiami, lini, papav. portulac. bolus armena, terra sigillata, C. C. ustum, cerussa, lithargyrium, marcasita, corallium, D 3 saccha.

saccharum saturni, & ex his parata cum albumine ovi cataplasmata, quò etiam faciunt succus papav. sperma ranar. unguent. liquirit, lac omnis generis, ejusq; serum ac cremor, qui cum cretâ in pollinem redactâ mixtus, potenter temperabit & exsiccat, aqu. ros. plantag. endiv. Lactuc. nympheæ, solani, tarax. mucilag. sem. cydon. psyllii, lini, fœnugr. gummi traganth. cum talibus aquis extractum, & alia: Circa quæ tamen hoc observatu necessarium est, ut ea moderatè, nec nimium adhibeantur, ne dum unum malum curare intendimus, aliud æquè grave producamus. In exulceratis autem papillis, quem antea in mammarum ulceribus laudavimus balsamum sulphuris quemvis, etiam hîc è re esse credimus, ubi tamen in id incumbendum, ut propter sugentem infantem gratissimus eligatur, qualis anisatus est, cum quo ratione virtutis paria faciet, Ballamus Hispanicus, de copayva & Peruvianus. Ubi erysipelate tentantur papillæ, juvabit aqua calcis vivæ cum saccharo saturni, aut si Luis veneræ suspicio adfuerit, cum Mercurio dulci decocta; inter evporista usu probatiora habetur flos lactis cum cretâ mixtus, (qui etiam cum superiori decocto papillarum exulcerationibus & excoriationibus medetur) aqua, flores, rob, & cortex sambuci medius, farina filiginea, empl. de sperm. ranar. &c. Sed & sudorifera internè exhibita, in hoc casu reliquis fermè palmam præripiunt Medicamentis, & blanda quidem, præsertim ubi etiam febricula quædam concurrerit.

XXV. Interdum lac spontè & continuo fermè effluit, tandemq; ubi aliquandiu extravasatum substiterit, acrimoniam contrahit, quâ & papillas & mammas, vicinasq; partes rodit & excoriat, cui medelam afferent medicamenta lenitiva & exsiccantia, ut lixivium calcis vivæ, pulvis & unguent. liquirit. ol. de vitell. ovor. sacch. saturni, marcasita, varia magisteria, & alia; poterunt item applicari mammis vasa vel vitrea, vel ferrea stanno obducta, quæ quidem eas non arctè adeò premant, interim tamen papillas excipiant, & in inferiori loco Lac colligant.

XXVI. Finduntur non rarò, licet cætera sanæ papillæ, quando à sugentis gingivis constringuntur, mordenturve ab ejus dentibus, quod malum adaugetur, si alio quodam vitio, ac præ-

præcipuè inflammatione afflictæ fuerint. Ubi statim in id incumbendum, ut inflammatio, ulcera, pustulæ, & quæ sunt alia ipsis inhærentia curentur ac tollantur; Supervacaneum verò credo futurum, prolixiorum talium curam exponere, cum hæc ex antecedentibus maximam partem desumi possit. Posthæc fissuras consolidare licebit, & quidem quò citius, eò melius, cui scopo inserviet bals. hypericon. de peru, sulphuris quivis, de Tolu, ol. ceræ ritè paratum &c.

XXVII. Reliquas inter motus & effluxus Lactis læsi species IVta est, quando idem spontè & sine omni suctu effluit, quia vel copiosum nimis, vel fluidius justo est, vel quando valvulæ tubulis appositæ laxiores aut erosæ sunt. Quomodo copiosum nimis Lac, ponderis ac distensionis sensu scēminas urgens, imminuendum sit, supra jam docuimus, pariterq; quâ ratione fluiditas ejus corrigi possit; Laxitas autem valvularum vix ac ne vix quidem sui emendationem admittet, adeò, ut experientissimus aliàs Sylvius fateatur, se hunc casum nunquam vel vidisse vel audivisse curatum, nec se illum juvando ullum proponendum habere remedium, nisi medicamenta blandè aromatica & subadstringentia forinsecus applicata, aliquid saltem præstare possint, si non multum juvent; erosæ autem infeliciorem adhuc de se spondent prognosin, & vel minimam sui restitutionem recusant.

XXVIII. Quæ Vtò notatur species motum & effluxum Lactis lædens, est, quando idem spontè & sine omni suctu effluit per vias inconvenientes, nempe ulcera & apostemata in papillis aut ipsis mammis facta, quod potissimum fit in mammarum inflammationibus & suppuratione profundâ; siue ergò spontè siue arte apostematis apertio fiat, ut plurimum tamen accidit, aut ratione ulceris grandioris, aut lanceolæ penitus intrusæ, ut tubuli quidam Lactiferi simul lædantur, quippe omnia apostemata, quæ in loco profundiore latent, nec spontè aperiuntur, nec arte, nisi cum partium plurium læsione; nam quando talia profundius hærent, omninò legnius etiam ad corporis superficiem sibi viam parant, quo intereâ temporis & partes vicinas, & vasa subinde erodunt; quod si autem arte aperiuntur, cum lanceolam penitus intrudere chirurgum oporteat, facilè ductus quos-

quosdam Lactiferos dissecando, Lactis effluxus per viam indecentem inferri potest. Quod si ergo ulcerum vel apostematum in mammis suspicio adfuerit, studere debet medicus ac praevenire (1) ut apostemata minima producantur. (2) ut quanto cyus ad suppurationem (si ea praevideri nequit) perducantur inflammationes. (3) ut suppurationes omnes ad externas partes, corporisq; superficiem, quantum possibile est, trahantur; Sic namq; multiplices noxae apostemata comitantes aut subsequentes tollentur, & ex minore spatio, quod apostema occupat, pauciores partes damnum patientur, & partium vicinarum cum vasis corruptio & erosio praevebitur. At si prae ter spem tubuli Lactiferi sauciati fuerint, & locum habeat curatio, discissa vel erosa vasa novâ carne muniri atq; oppleri debent, ut lacti naturalis motus denuo concilietur, nî vasa inter consolidandum penitus obturentur aut coalescant. Certum tamen, difficulter & segnius consolidari ac carne concludi ductus & vasa, lac continuo evomentia, quia segnius mundantur & carne implentur ulcera ex apostemate cava remanentia.

XXIX. Progredior ad Ultam speciem motus & effluxus Lactis læsi, quando idem effluit cum Lactantis debilitate, quod fit propter nimiam Lactis producti copiam, quamvis non semper, cum etiam debilitatis hujus causa sæpe pendeat vel à peculiari foeminæ constitutione, quæ nullam vel minimam Lactis jacturam absq; notabili virium dejectione perferre valet; vel à lacte spiritibus nimis largiter imprægnato atq; foeto, unde licet ejus parum tantum eliciatur, vires tamen ob tale dispendium insigniter dejiciuntur; vel etiam ob accedentem insignem mammarum dolorem, quæ omnia virium notabilem dejectionem, animi deliquio maximè affinem, inferunt.

XXX. Jam cum per nimiam Lactis productionem & educationem sanguis indies minuatur, corpus marcescat, vires hebetentur & deficient, tandemq; notabilis languor & animi deliquium, foeminas quotiescunq; lactant, corripiant; productionem illam minuere conveniet, alimentis præprimis succi crassioris, & difficilioris fermentationis, remediis item fermentum lactificum aliquatenus obtundentibus, sæpius monstratis, quin & adstringentibus & sanguinem aliquatenus crassiores efficientibus,

bus, ut sunt plantago, sanguisorba, tormentilla, bursa pastor-
myrtus, quinquefol. aloë, mastiche, sangu. Dracon. succinum.
Lap. hæmatit. creta, C. C. ustum, bolus armena, terra sigillat.
ceruss. corall. ebur foss. margarit. Lap. pretiosi, Lap. Medica-
mentosus, Troch. de berber. charabe, corall. spod. & alia, quæ
acidum volatile, à quo sanguinem in Lac mutari diximus, blan-
dè infringunt & absorbent; hûc etiam quadrant acida quædam,
dummodo ea omnia quantitate parvâ & circumspectè adhibe-
antur. Externa adstringentia vix locum habebunt, propter
metum, ne Lac in mammis coaguletur, & inflammationem pa-
riat. Quod si remediis his malum non cedat, ut Lactis pro-
ventus viriumq; languor inhibeatur, & mater ab interitu serve-
tur, cessandum ab ulteriori Lactatione, & infans alieno vel La-
cte vel liquore alendus: Id quod etiam eas fœminas facere oport-
tebit, quæ propter peculiarem sui constitutionem, vel Lac ni-
mis spirituosum, in animi deliquium ex eo emisso, incidunt.

XXXI. Mammarum autem dolor, vehementiâ suâ La-
ctantibus animi deliquium sæpè pariens, genitorem agnoscere
videtur ductuum Lactiferorum nimis brevium, & valdè sensi-
lium, crebriorem tractationem & extensionem suctu factam, si-
quidem tubuli isti, quoties præter morem breviores sunt, aut
partibus vicinis intricati vel implexi, toties dum suctus fit, val-
dè extenduntur, jam verò quia hi membranosi, & omnes partes
membranosæ valdè sensiles sunt, nec sui magnam extensionem
perferre possunt, dolor inde molestus excitatur atq; exquisitus,
animi tandem deliquium inducens. Pro quo leniendo & cu-
rando, inserviet frictio, manu molli sæpius reiteranda, præte-
reaq; illitio oleorum lenientium & emollientium, lil. alb. puta,
amygd. dulc. irini, hyperic. lumbric. terrestr. verbasci, populi-
num, & similia, quæ tandem ductuum dictorum extensionem
procurabunt. Hisq; omnibus nil proficientibus, itidem à La-
ctatione cessandum erit.

XXXII. Ultimò tandem motus & effluxus Lactis lædi
potest, quando ejus loco vel sanguis, vel pus, vel sanies, aliusve
humor, aut heterogeneum corpus effluit, excernitur, ex fugi-
turve per papillas. Fluit autem Lactis loco merus sanguis, quan-
do (1) in mammarum glandulis non mutatur in Lac. (2) quando

avidè nimium & copiosè exsugitur, adeò ut ob temporis penuriam ejus materia ex sanguine secerni, & Lac tam citò constituere nequeat. (3) Quando vel suctu vehemente, vel ex vulnere, vel abscessu læduntur vasa sanguifera; quas quidem causas in antecedentibus jamdum attigimus, unde hîc tantum monemus, pro earum sublatione vel raram, vel nullam prorsus lactationem instituendam esse, dum interea ut in omni, sic & in tali, quovis demum modo ille fiat, sanguinis effluxu, loco ceterorum maximè prodesse sanguinem Draconis, notârunt Practici. Præterea verò pus vel sanies loco lactis interdum prodit ex apostemate ad papillarum tubulos pertingente, quale quidem, si apostema non adeò grande sit, commodè exsugetur nutricis ope, nec tamen negligenda sunt fomenta & decocta vulneraria, forinsecus & intrinsecus usurpata, præprimis addito spiritu vini penetrantia facta, quibus mundatio & consolidatio ulceris promoveatur, quod etiam præstabit commendatus antea balsamus sulphuris. Ast superficiiei proximum apostema in loco declivi ac molliori commodissimè aperietur, adhibitis dein supra laudatis mundificantibus & consolidantibus.

SECTIO IV.

De Lactatione læsa.

TH. I.

HActenus de Lactis generatione, motu & effluxu læso, egi, quæ pro diverso sui respectu Lactationem lædere possunt: nunc ipse Lactationis actus paucissimis considerandus, atq; sermo de eo habendus erit. Est itaq; , ceu in Sect. I. dictum, Lactatio ritè se habens, Lactis in mulierum mammis producti allectio per papillas, ope suctus & pressiois à sugente factæ.

II. Nimirum ad perficiendam eam requiruntur quædam in foeminâ Lactante, quædam in sugente.

III. Sugentis requisita recensere, tum talia vitiata examinare, mei nunc non est instituti, cum Lactationem respectu nutricum tantum, proponere animus ferat.

IV. Ad hanc ergò commodè absolvendam pertinent (1) papillæ

pillæ & crassitie, & longitudine mediocres, non prægrandes, nec nimis exiles, nec breves. 2. Eadem integræ à dolore immunes, non fissæ, inflammatae, exulceratae, excoriatæ. 3. Tubuli Lactei quoad meatus ritè conformati, & per papillas pervii. 4. Lac debito modo generatum. 5. Affluxus ejus & effluxus nec copiosior, nec parcius.

V. Jam verò ex uno alterove, aut omnibus his læsis oritur Lactatio læsa, eaq; tripliciter. (1) Quando in totum impedita est, & nulla fit. (2) Quando insufficiens. (3) Quando abundantior contingit.

VI. Nulla fit primum, vel culpâ Lactis, quando idem coagulatum, ad motum & effluxum ineptum est; vel partium ad lactandum desideratarum. Quomodo coagulatum Lac dissolvendum sit, ex hæcenus dictis haurire licebit. Per partes autem ad Lactationem necessarias, intelligo papillas, & vasa ipsum Lac ad mammas deferentia: Vasa sanguini deferendo inepta, aut deficientia, propriè loquendo, accuratè huc non referenda videntur, quippe tunc non deficit Lactiseductio, sed Lactis productio, non entis ergò nulla erunt accidentia.

VII. Papillæ autem vel defunt in totum, vel saltem deesse videntur: à primo statim ortu absentes, aut demùm morfu infanti amputatas resarcire, humanæ non est artis opus. Interdum tamen in quibusdam fœminis deesse videntur, aliis ante imprægnationem & partum, aliis post partum quoq; , imò institutam etiam antehac Lactationem, quando sc. nimium retractæ sunt, & latent in mammis. Has ergò, nisi post partum spontè emergant, artificiosè decebit elicere, & quantum fieri potest commodas efformare, vel blando saltem affrictu, aut suctu, vel impositione pileorum cereorum, eburneorum, argenteorum, aliorumve, aut si vehementiorem casus postulet operationem, papillæ pars aliqua vi extrahatur, & in ambitum circumligetur. Hæcque ratione breviores etiam prolongari queunt: sed crassitie aut longitudine prægrandes nimis quia curationem omnem respuunt, intactas relinquere oportebit. Reliqua papillarum pathemata, cum annexâ curatione suprâ commodius exhibuimus. Sed vasa reliqua, Lac per papillas ad mammas deferentia, Lactationem abolent, quando vel deficiunt, (quod ta-

men rarissimè contingere posse credo) vel compressa, vel obstructa sunt; comprimi solent à tumoribus in ipsorum viciniâ subsistentibus, inprimis autem à lacte vel sanguine extravasato, coagulato, & inflammationem pariente; à quo ipso Lacte coagulato etiam non rarò obstruuntur, quibus tamen malis ex Thesibus superioribus occurrere licebit.

VIII. Insufficiens deinde fit Lactatio, iterum vel Lactis, vel tubulorum Lacteorum culpâ, quando nempe vel Lactis aliqua pars coagulata, vel ductuum quidam nimis angusti, aut compressi, aut obstructi sunt. Sed quid his insistam, quæ Lactatio abolita respectivè declarat?

IX. Accedo igitur ad illam læsæ Lactationis speciem, quando ea abundantior quàm par est, contingit, idq; similiter vel Lactis, vel partium in lactante ad lactandum requisitarum culpâ. Quapropter Lac hîc tam in quantitate excedet, & redundabit, quàm etiam in qualitate, & nimis fluidum existet, quo de imminuendo & incrassando jamdum egimus. Reliquæ partes peccantes erunt potissimùm tubuli patentiores & ampliores, atq; valvulæ ductus mammarios à papillaribus distinguentes, laxiores. His ergo ut opem ferat medicus, nî modò malum sit incurabile, medicamenta blandè adstringentia, formâ tum humidâ, tum siccâ mammis forinsecus, maximè verò circa papillas applicabit; ita poterit fomentum vel cataplasma parari ex radicibus, foliis, & floribus blandè adstringentibus, in aquâ feratâ, vel vino rubro decoctis, & calidè applicatis, aut poterunt talia sacculis includi, calidèq; mammis imponi. Et recensitis potissimùm modis Lactatio læditur, læsaq; curatur. Placet autem his alium foëminarum morbum ex Lacte oriundum, annexere, quem exhibebit sequens

SECTIO V.

De Febre Puerperarum Lactea.

TH. I.

DEscribitur hæc, quod fit ebullitio sanguinis, plerumq; circa tertium aut quartum à puerperio diem foëminas invadens,

dens, à chylo, propter præpeditas excretionis vias, in massam sanguineam restagnante, oborta.

II. Causa effervescentiæ hujus febrilis videtur esse chylus lactescens, circa uterum secerni solitus, qui à puerperio in istâ excretionis viâ impeditus, in sanguinis massam restagnat, atque utero relicto ad mammas transfertur; cum itaq; magna chyli hujus lactescantis portio in massa cruoris subsistat, & debitum succi nutriticii penum excedat, atq; adeo tota assimilari nequeat, insuper etiam partibus heterogeneis scateat, velut extraneum quoddam, & non miscibile sanguini molestiam creat, proq; ipso eliminando, & foras excernendo, effervescencia febrilis tridua impenditur.

III. Signa diagnostica affectus hujus sunt, quod puerperæ, (licet non omnes, pleræq; tamen) intemperie febrili, cum siti, calore, & inquietudine totius corporis affligantur, conquerantur etiam de dolore gravativo in dorso & scapulis, de mammarum plenitudine & æstu.


IV. Prognosis quod attinet, rarius hæc febris ad mortem terminatur, nisi vel lochia sistantur, vel errata in victu admittantur, aut causæ quædam evidentes aliæ accesserint, ut sanguinis effervescencia intendatur, & febris lactea, pejora advocans symptomata, in putridam, seu malignam abeat. Si verò ad salutem illa terminetur, vix ultra triduum perdurabit, dummodò lochiorum fluxus sese legitimè habeat; intenditur tamen interdum atq; diutius perseverat, si quando Lac ubertim mammas ingressam non emulgeatur, aut si topicis repellentibus violenter abigatur. Modum eventus tandem quod attinet, dummodò lochia rectè fluxerint, sine ope medicâ, post effervescenciam sanguinis intra tres vel quatuor dies peractam, aut sudor copiosus, aut transpiratio liberior hunc affectum solvit, quandoquidem hujus ope, aut particulæ humoris Lactei inter assimilandum degeneres, aut recrementa adusta, à sanguinis deflagratione residua, eliminantur & in auras abeunt; interdum, si per fortiora repellentia ex uberibus propulsum fuerit, aut spontè abscefferit Lac, cum lochiis sub humoris albicantis formâ excernitur, & sudor, aut largior diaphoresis morbi reliquias evaporare facit.

V. Ut adeò ope Medicâ non hîc opus sit : Quòd si tamen Lac copiosè nimis in mammas ruat , ut earum inflammatio, & sanguinis immodica effervescentia antevertatur , imperare potissimùm decet victum tenuiorem & parciorem, ut & in minori quantitate assumendum; ubera etiam suctu crebriori depleantur. Si mater infantem lactare noluerit, tertio à puerperio die, in usu habetur ceratis modicè adstringentibus mammas obtegere , pro constringendâ aliquatenus spongiosâ glandularum substantiâ; quibuscum tamen cautè agendum, ne per fortiores constrictiones, Lac subito restagnet, & majora mala, imò febrem putridâ vel malignam, inferat.

T A N T U M.

SOLI DEO GLORIA.





COROLLARIA.

I.

Prestat materno, si licet, infantem lactare lacte, quam alieno nutricum.

II.

Hecq₃ Lactatio, pro circumstantiarum ratione, ab anno ad biennium usq₃ continuari potest.

III.

Tempus ablactationis autem constituitur ut plurimum, quando Luna in incremento est, & anni tempus nec caloris aestu, nec frigoris rigore, excedit. Quae porro circa ablactationem observanda veniant, docet Joh. Georg. Sommer Tract. Weiber und Kinder Pflégbüchlein/ cap. 8.

IV.

Quaunque certis de causis, & materni, & nutricum Lactis usus, recens natis interdici jure possit.

V.

Et substitui Decoctum C. C. fœniculi, aliusve liquor cum convenientibus permixtus.

VI. Si

VI.

Si casus necessitatis pro lactando infante nutricem postulet, in seligendâ eâ potissimum attendi debent : Aetas, corporis conformatio, mores, Lac, mammarum ac papillarum constitutio, tempus novissimi partus, sexus & natura infantis eodem partu editi, ne gravida, cætera verò, quantum possibile, sana sit. Quæ prolixius explicat Joh. Nicol. Pfizer von der Weiber Natur Lib. I. Part. IV. c. 16. & Joh. Georg. Sommer Tract. Weiber und Kinder Pflegbüchlein cap. 3.

VII.

Virgines in statu concipere nequeunt.

